


寇忠愍詩集三卷

從身重閣所藏明本透寫坊



錄藏宋萊國忠愍寇公詩集引

惟有天下之大才斯成天下之大務所謂天下
之大才前代姑置弗論若宋萊國忠愍寇公者
非其人與其相真宗也虜犯澶淵勸上親征不
動聲色而措天下於泰山之安非成天下之大
務與竟以讒譖謫居遐荒齋志以没人皆寃之
尋詔歸葬洛師又詔復官爵又詔節惠易名又
詔史臣述功行以垂後世卒於公無所損而公

之名愈彰彰於世矣承裕年甫三十餘讀公之詩知其有劉長卿元微之之風格於是錄而藏之時時展讀則公平生為人之大槩未嘗不往來於胷臆間也時弘治庚申歲夏四月平川王承裕書

萊國寇忠愍公旌忠之碑

參知政事孫抃奉

勅

上祀合宮之明年夏四月召兩府臣諭之曰故太子太傅萊國公寇準方嚴鯁亮有文武偉才在

太宗

真宗朝建大功立大節輸謀納忠誠貫白日不

幸以譴終朕甚歎嘉之其敕史氏謨揚勲烈具誌于石用垂示來世遂以命臣抃翌日又下詔賜旌忠之額且親篆以賁寵焉臣承命恐悻謹拜手稽首書其事公諱準字平仲其先出上谷昌平盖春秋時司寇蘇公有勞於王室因官以命氏後世率多聞人若東漢恂子翌漕河內破蘇茂畫像雲臺為中興勲臣曾孫侍中榮以辨絮亡匿宗黨潛散它土故譜謀亡傳又數世有

徙居馮翊者籍于三峯下遂為華州下邽人曾祖賓祖延良以唐末亂不仕父湘博古嗜學有文章名晉開運中登甲科冠多士後應辟為魏王記室終焉知人者惜之以公貴封燕陳晉三國公贈官至太師尚書令曾祖母白氏祖母鄭氏母趙氏封許陳曹三國太夫人準始生風骨峻爽與常童不類及從師入學校趨隅占對毅然有成人風采既冠讀左氏公羊穀梁傳不俟

講說不循注疏三家異同之說輒援筆剖析以
辨明之辭道理正沛若大手先儒老生曰是真
所謂宿習者年十九一舉擢進士第解褐授大
理評事知歸州巴東縣時太平興國五年也後
三歲補大名府成安軍三遷殿中丞調兵食于
西夏還差通判鄆州得召見稱旨遂給札試禁
中授右正言分直東觀中謝日賜緋袍銀魚罷
汶上之命充三司度支推官俄轉鹽鐵蠲司判

官公事會詔百官邊事準極疏利病天子器之
擢署尚書虞部郎中充樞密直學士賜金紫判
吏部東銓未幾丁曹國大夫入憂有詔權奪不
得已起視事淳化改元授左諫議大夫充樞密
副使尋改同知樞密院事封上谷縣開國男是
年十月領青州明年九月召赴闕守本官叅知
政事中進封上谷郡開國侯至道二年閏七月
知鄧州

真宗皇帝嗣位遷尚書工部侍郎咸平元年五月移河陽軍二年八月改同州三年夏朝京師行次闕鄉就授鳳翔府五年五月詔詣行在轉刑曹權知開封府六年六月遷兵部充三司使進封開國公時始復鹽鐵度支戶部為一使景德六年特授守本官同中書門下平章事集賢殿大學士二年十一月加中書侍郎兼工部尚書三年二月罷相進刑部尚書知陝府祥符初扈從東封回遷戶部尚書知天雄軍四年四月改兵部尚書車駕幸亳權東京留守六月遷檢校太尉同中書門下平章事充樞密使八年四月罷機務授同中書門下平章事持節鄧州諸軍事行鄧州刺史充武勝軍節度鄧州管内觀察處置使知河南府兼西京留守司移判永興軍天禧元年二月換節襄州三年四月詔赴京六月特授行中書侍郎兼吏部尚書同中書門

下平章事充景靈宮使集賢殿大學士十二月
改尚書右僕射四年六月罷相授太子太傅進
封萊國公九月降授太常卿知相州八月移守
安州途次襄陽貶道州司馬乾興元年二月再
貶雷州司戶叅軍準疏通博裕果敢沈毅能斷
大務不循細檢喜風幹善議論與人無城府接
物無崖岸顧大義可為者必奮厲翔躍以身先
之其勇若賁獲至於外險中艱斬然涯垠亦坦
坦無退衄意聞一善薦道推輓不進用不已附
離苟合者疾之如仇離初補吏治二邑推至
部中會期賦役止計鄉里姓名諭寺門民赴之
無毫髮稽遲者本道論薦至有以魯恭卓茂為
比嘗奏事

真宗言切直上怒起準以手攀帝衣復御座持
議益勁固神色瞭然事既決乃退上曰此真將
相才吾得之若唐文皇倚魏鄭公爾歲大早上

問政闕失準對曰在洪範天人之際若影響是固刑有所不平爾祖吉王維皆陛下朝臣頃曲法受財各伏萬計吉伏誅家具籍沒維止校于私室仍領濠之定遠簿蓋叅知政事汚同母弟也陛下重輕如是亢燠之咎殆天所以誠告上嗟悟者久之咸平景德中契丹頻歲犯塞多縱遊騎剽略小不利即引去徜徉無鬪意準曰是狃我也願朝廷練帥領簡驍銳分據要害地以捕之是冬果大舉舉國來寇越瓦橋攻高陵直抵于澶魏將飲馬河孺

真宗憂之召群臣議或曰寇深入矣宜戒嚴京城益重兵守衛或有西南之幸準止之曰淺議方今聖德明備上合天心將臣協和叅講師律若帝馭順動一舉而北彼黨類自當遁走設未然則出兵以撓其謀堅守以老其衆顧主客勞逸之狀我得勝算必矣上悅於是大駕北征至

澶南城中外獻言願駐蹕以觀形勢準曰不過河則人心未寧虜氣未懾非所以取威決勝也且王超領勁兵屯中山以扼其亢李繼隆石保吉以大兵扼其左右肘四方征鎮赴援日至何慮而不進固爭之連頓首於上前意氣詞語憤然感慨是日幸北寨御北樓觀視營壁撫勞部伍軍民歡叶自近及遠聲振于數郡虜相視怖駭不能成列俄而勁弓伏發殄其元帥因密奉

書以請盟朝廷始遣曹利用往成之御史缺準取沈毅敢言士塞詔同列者不悅屢白吏持例文進準曰宰相所以器百官今用例則所謂進賢退不肖乃虛語耳命去之故士擢用在準持衡時得人為多先帝倦庶政丁謂曲姦迎合結權倖以用事準請問便殿數其姓名曰某與某皆壬人異時不可輔少主願更擇方亮大臣為羽翼矧皇太子睿德天縱英聲日茂延師傅議

經史默識古今成敗事見臣僚決機務周知天下安危計雖周之成漢之昭殆難以擬議陛下胡不協天人之係望講宗社之正謀引登大明敷照重霄固祖宗萬世之基本言訖俯伏鳴噎議未下明日黨人以急變聞飛語密中準準坐此得罪既行過零陵踰大陂護兵從騎先後不屬溪夷乘間鈔掠而去已而酋長召告之曰聞寇準在道若等柰何竊賢相行橐神明其祐若乎趨遣種人持所掠還準伏道下引罪且拜公慰遣之至南海晨旦朝謁從事如常時謂其子曰守法奉正士人常操以窮通成敗易之者非吾意先是署東偏屋凡數楹陋不庇風雨準完基訪材構為層樓置几榻其間經史老莊及天竺書環列前後暇或看誦之賓至則憑高瞰虛笑語燕燕若初無廊廟之貴者嶠南山水峻絕其道路往往斬崖瀕澗曲折高下馬不能平進

郡縣官有伐竹為輿以迓準者準謝曰吾罪人騎馬足矣冒炎溽捫險阻日行百里左右為之泣下準昂然無隕獲容色其度量過人如此及雷陽吏以圖獻閱視之首載郡東南門抵海岸凡十里準恍然悟曰吾少時有到海抵十里過山應萬重之句迺今日意爾人生得喪豈偶然耶自是色空夢幻深詣諦法危坐終日寂無他營天聖元年閏九月移授銀青光祿大夫檢

校國子祭酒行衡州司馬是月七日以疾終於貶所年六十三嗚呼非常之功遇非常之器業然後成不世之節待不世之忠賢然後立且準初繇計府入輔屬三聖紹統四隅和晏上方講稽儒術尊右文教以成太平之形容敵人睚眦出我不意衆號百萬北方騷然文紳武綬策慮倒置準抗難犯之色建不拔之議天威燁揚霆激而雷掣大惠鋪迪春熙而日融民焉息肩士

也卷甲憬彼氛祲凝為至和逮今三紀矣而羽
書不馳烽燧不舉義信惇結古無與鄰準之功
馬伏波周尚父之功矣洎自秦川再相時闡闡
親政猾儉當路恟恟中外靡遑底寧準密圖本
元深遏萌漸毅氣一吐形于謨明排邪斥疑瀆
死不顧聞準之風者心魄駭褫而後知大正不
可干大奸不可肆大名不可取大器不可窺佞
夫忠懦夫有立志及

真皇棄天下倖黨斂手畏伏忠義兩宮坐朝庶
政平一輔翊慈惠卒隆寶圖準之節霍子孟狄
梁公之節矣準篤志于學而晉公亡歲時祠祀
感激涕淚泫然若孺慕者終其身不易在成安
兄弟以卜葬為請準曰未也父為士子為大夫
葬則士祭則大夫吾先人以文學中高第卒事
王藩若追贈未逮則陪臣矣吾豈忍以士禮葬
既通顯乃護二喪還成安太子遣中貴人勉諭

贈恤恩數踰等大為搢紳榮初丁崖貳政以諛
冒自任又能陽為戚施伺人顏色密圖忌間之
漸一日會食政事堂羹瀝準鬚謂起以袖徐拂
之準正色曰公忝國大臣乃曲躬為官拂鬚耶
謂大愧其後邪正寢戾甚於冰炭簧言營營日
肆媒孽準簡固醇挺未始一疑於心故及南遷
之難至今天下皆寃之無幾何謂敗得竄道繇
海康準從者有欲釋憾謀不利於謂準知之陳

大席一廡間設戲具悉召坐且命之博弈因隱
机觀焉聞謂行乃罷平生著述於章疏尤工國
政民事亡巨細鈞校利害為上悉陳之其旨粹
其言簡故多所開益餘藁都焚滅棄去雖至戚
不得見好為詩警策清悟有劉夢得元微之風
格其氣跋竒拔則又過之準起諸生兩朝內外
更委幾四十載其間較評詮選摠決浩穰主財
利之煩膺居留之重助敷密畫叅告大猷剖符

十藩持節二鎮一踐樞弼再登宰輔小則糾逖
逋隱刷除弊欺嚴之以闕防正之以繩墨差立
定格牢不可踰大則鼓動賢業彌綸帝載朝家
系之休戚政教關之治亂表正四海斷焉一德
凡累封戶萬二百真二千七百爵上公階勲極
品功臣始賜推忠佐理加推誠保德崇仁忠亮
翊戴人臣之遇其亦至矣然而不置私第不營
田園所得俸賜皆分給宗黨故舊去之日家無

餘資及

朝廷許葬洛師獲還之費僅能完給久之詔復
舊官爵賜謚曰忠愍公前娶許氏故給事中仲
宣之女不及準而亡再娶宋氏故左衛上將軍
邢公延渥之女封晉國夫人準無子以弟之子
隨為後隨勁介有履行終于殿中丞女四人長
適樞密使尚書吏部侍郎同中書門下平章事
王曙次適太府卿畢慶長次又為畢氏繼室次

適司封員外郎直史館張子臯孫四人長諲贊
善大夫次誦誠並大理評事次諭未仕君子謂
公慮已也輕以約謀國也勇而固義在則死不
足畏義亡則生不足惜勢無以移其操利無以
疚其心出處始終孚合大正昔之垂勲名載簡
編者有幾宜乎沒世三十年而完天子思之生
民懷之搢紳景行之古風穆然炳炳如在詩云
樂只君子邦家之基準之謂也銘曰

太宗膺圖章聖御極丕昭武經誕布文德準起
孤童遂階貴籍歷事兩朝荐釐庶職剛嚴俊明
篤厚直直非義不蹈非忠不迪開補治具桓桓
智力指陳機宜侃侃容色遼人猖狂入犯王域
蟻結魏南狼跳燕北準抗一言群類惕息天嗣
繼照闇慈叅翊猜萌構險佞間投隙準天一謀
姦人馭踏晏晏萬務愉愉四國如石之堅我社
稷如山之安我疆我場亮節高峙讒言衆惑

忠貞文集
勞既不圖咎從而得風濤暮涉瘴嶺晨陟氣凌
飛雲誠貫白日至于隕世曾靡憂戚道無久否
帝用近惜申詔在庭俾書其實海田變更陵谷
遷易準之大名時萬時億

新開寇公詩集序

道州介乎湖南廣西之兩間江山迴合秀潤所
鍾風俗淳厚其民尊賢樂善為兩路甲自昔聞
人如陽亢宗元次山呂溫薛伯高等相繼為州
刺史邦人榮之經數百年至今祠事不忘也次
山嘗節度荆南又經略容管等八州矣然世必
曰元道州而獨道州祠堂在焉丞相萊國公以
元勳大德歷事

太宗

真宗二帝膏澤滲漉衣被天下方其盛時出入將相雄藩鉅鎮分閫授節濟民利物隨在周洽暮年遷謫始至道州其在道州也躊躇退縮卷而藏之固無向時之施設也然百餘年間求其遺迹而諸鎮之客館皆丘墟矣惟道州有寇公樓尚繪公像事之豈非尊賢樂善之俗然乎宣和壬寅次翁受命假守既至拜公像凜凜若見其人方且朝夕磨勵取公師法施之郡政顧樓久不葺廼命工易椽桷之腐朽者完甃砌之頽闕者飾堊釁之漫漶者既煥然一新矣又得公詩三卷凡二百四十篇為校正其訛錯鏤板傳久且公之事業焜耀竹帛與日月爭光非待詩而後傳也蓋以慰邦人無窮之思而么麼趨趨亦庶幾託公詩以不朽乎宣和五年十二月朔濟南王次翁序

忠愍公詩序

金紫光祿大夫行尚書戶部侍郎知河陽軍

州事上柱國范雍述

混茫之始判而異焉騰為輕清降作重濁著之顯者從其類矣是故三辰晶明委照萬寓風雲縹緲周流八極附於天也培塿成垤因之原隰潢汙積派隨其窪窳從其地也其間萬物悉由稟焉若稟之清者飛則為鸞鳳鵬鷃走則為騏

麟駟駮茂則為芝蘭菹芷植則為松桂筠篁引而伸之不可勝數人為物之靈也是以得乎輕清則為賢為聖為明為哲為君仁而睿為臣正而肅為父慈而溫為子恭而順發為事業則惠愛同濟聰敏純慤形于文章則典切淵奧鴻博麗正斯蓋出乎異稟忠愍公所謂輕清之降靈焉其鍾體質也溫粹莊厲和氣襲物其立臣節也端亮平直英風可尚其施政教也寬簡明裕

視民如傷其為文章也優贍微婉屬意綿密尤
工於詩曲盡風雅藻 宏逸峻格高遠因興發
詠必根於理得騷人之旨趣焉故所成篇詠膾
炙衆口傳寫寶秘恨不多得鴻筆與學靡不欽
歎故樞相文康即公之壻寔有道之士焉志公
之墓叙初知巴東曰詩家者流目為冠巴東以
方前代羅江東趙渭南也錄公警策之篇若遠
水無人渡孤舟盡日橫到海只十里過山應萬

重此詩二
全篇也等句又謂公之為詩必本風騷之旨而

以感傷為主嘗為江南春二絕其一曰波渺渺
柳依依孤村芳草遠斜日杏花飛江南春盡離
腸斷蘋滿汀洲人未歸其二曰杳杳煙波隔千
里白蘋香散東風起日落汀洲一望時愁情不
斷如春水人曰少貴無不足者其攄辭綺靡可
也氣焰可也惟不當含悽爾今而思之迺暮年
遷謫流落不歸之意詩人感物固非偶然時以

為文康公之知言也大約公之為詩多有此意
又如聞杜宇云曾為深冤無處雪長年江上哭
青春平林雨歇殘陽後愁殺天涯去國人此非
先詠南行之事乎公平昔酷愛王右丞韋蘇州
詩吟味斯則過矣雍 為公倅常從游讌多聞
其得意之句情思閑雅聽之忘倦隨錄簡牘才
數十篇今守三城會監軍趙侯臨即公之中表
也日與游接時道公詩因請於公家盡錄昔所
存紀得二百餘篇并前之所錄不在此數者及
謫官後趙公所記共二百四十首類而第之分
為上中下三卷其餘流落無復求購懼歲久磨
滅因序以成編此第言公之詩也若大節賢行
則有追謚詔旨存焉亦錄于集首俾開卷者不
獨仰騷雅之道爾

贈謚誥

知制誥丁理行

勅夫徇義保躬賢哲罕兼其致原心觀行褒沮

得伸其公惟節惠之舊章寔經世之明勸不有
正議孰旌遺烈故開府儀同三司太子太傅上
柱國萊國公冠準器質莊重風猷簡貴感會先
聖網繆上司明心若丹直道如矢逮余主鬯之
日寶乃秉鈞之秋圖惟協恭罔有二事邁盜言
之噂沓挾危法以中傷白璧易汚貝錦難辨再
罹遐謫遂及云亡終悲寒露之歸徒軫幽泉之
痛間雖游伸澄雪追責寵嘉而誅功易名尚闕
恩禮沉謀秘畫淪于疑論逝者莫愬朕甚閔之
謚法有危身奉上曰忠佐國遭憂曰愍合是休
典慰其焚魂宜特賜謚曰忠愍

忠愍公詩集

卷一



忠愍公詩集

國家圖書館, NATIONAL CENTRAL LIBRARY, TAIWAN, R.O.C.

忠愍公詩集卷上

開府儀同三司太子太傅贈太傅中書令

上柱國萊國公冠

奉和 御製中秋翫月歌

戒井銅龍漏水平玉輪初滿物華清光連南極
星輝正影泛中天帝宇明風來蘋末披輕霧香
濕蘭叢浥零露絳河橫度燦雲章靈鵲群飛遶
宮樹法久照兮慶昌時樂芳晏兮忘疲敷睿文

芳玩澄景當嚴更
芳漸永九門秘邃敞堯宸
靄靄金波矚目頻
進牘豈能抽鄙思
賡歌深媿預朝倫

奉 聖旨賦牡丹花

時正言直館

栽培終得近天家
獨有芳名出衆花
香迥暖風飄御座
葉籠輕靄襯明霞
縱吟宜把紅牋襞
留賞惟張翠幄遮
深覺侍臣千載幸
許隨仙仗看穠華

奉和 御製南郊禮成

荐降靈符昭瑞命
文脩盛則薦清衷
朝真曲里揚丕烈
類帝圓壇報昊穹
述職萬邦咸執玉
來庭異域協占風
禹功高大天無極
堯德明如日正中
福浸含生臻富壽
澤流綿宇霈龐鴻
染盛豐潔神皆饗
金石和平政本通
鬱鬱雲煙當畫麗
熙熙景物共春融
群臣抃蹈瞻宸扆
比南山祝壽躬

奉和 御製真游殿上梁

敷崇妙本膺丕既濬發鴻源示永年吉語密傳
當乙夜粹儀祇覲擁祥煙皇心翼翼精齋至祖
德綿綿道誨宣誕集純禧彰錫羨交修茂典表
欽先爰稽大壯新瓊宇仰法殊庭設綺筵山積
瓌村咸備矣神扶華棟見巍然元龜獻兆良辰
協哲匠施勤庶藝全四柱如翬循寶勢觚稜削
玉燦珠躔黼帷夙設宸居麗翠葆躬臨聖志虔

昭答明靈陳盛會睿詞敷暢煥雲牋

奉和 御製郊外觀稼

天苑清塵宿雨收翠華觀稼慶盈疇氣和玉燭
成豐歲露冷金莖凜素秋日麗鮮原平杳杳煙
含嘉穀鬱油油共知省斂敦農事信史騰芳紀
聖遊

瑞慶園觀稼奉 聖旨次韻

善苗棲畝昭靈既禁苑鳴鑾值宿秋斂籍神倉

思恩詩集上
符禮本采詩良耜慶農收宴開雲幄皇慈洽日
駐天衢睿賞留千載逢長增嶽并清塵叨從屬
車遊

應 制賞花

上苑經春雨宸遊屬盛時花光籠寶檻柳色暗
龍池潏灑雕觴滿融和暖日遲共歌成至樂千
載播聲詩

應 制太清樓觀書

仙禁開書府神毫紀格言簡編包舜禹圍範總
乾坤稽古崇邦教斯文闢聖門從遊觀奧秘何
以報宸恩

御製乃眷儲闈方崇學術錫群書於冊府
勵至業於承華日命近班同觀盛事七言
十韻詩一首奉

聖旨次韻

景命昭彰佑德基元儲敦裕協祥期寢門劬至

嘗無怠學肆多聞詎有疑金玉騰音鏘睿律簡
編申錫振良規河圖奧秘言誠訓藝圃優柔善
益資玉宇風清傳密詔蓬山雲委錫芳蕤天顏
不遠回宸眷肉味都忘聽寶辭燕翼詒謀欣教
盛上庠隆道慶才竒叨逢華旦居黃閣久侍宣
遊近赤墀恩厚荐承三晝接力微寧致百工熙
東闈疏問英猷遠聖慮乾乾更念茲

御製慶先后升祔禮成七言六韻奉和

天錫靈符興寶祚澤流綿宇福含生蒸蒸日上孝
咸歸厚翼翼精衷尚執盈順考漢儀彰道廣欽
崇周典闡文明豆籩合饗豐盛備管磬同和雅
奏成愛景融輝昭善應非煙絢采協殊禎尊升
茂典光惇史稽古鴻猷振帝絃

應 制賞花釣魚

龍禁含佳氣鑾輿下建章碧波微蕩漾紅萼竟
芬芳玉笋春醪滿金波晝漏長逢時空竊抃萬

寓正懽康

和 御製降聖節內中道場觀瑞鶴神雀
歌

秋殿霜凝當永夕靈場齋潔方無斃高真諄誨
昔親聞上帝休禎今再覲鬱葱兮卿雲仙鶴兮
不群肅清兮采席神雀兮振翼香飄華燭焰亭
亭風度翠簾聲歷歷嘉應紛綸寶運昌聖人功
與天無極

奉和 御製奉祀述懷詩

巍巍至德充綿寓翼翼宸心臨兆庶覆育懷生
動法天講求茂典皆師古協和神化踵唐堯彬
蔚頌聲踰吉甫赫弈皇威振八荒清夷王度綏
中土豐年朝野正懽康溢牒克圖福紀祥睿聖
繼明恢大業禎符錫祚降穹蒼省方展窠宣邦
職登岱銘功舉國章睢上埋牲專事地漢唐故
實存聞記精靈昭感果潜通瑞應昭臻知所自

聽羽光臨神告彰
洪源肇啟僊游暨瀨鄉舊壤
闢珍詞款謁齋莊
敦睿意譙都奏牘達彤庭者
耆雲趨共瀝誠順考皇儀尊妙道再脩盛節徇
輿情聲明文物當興運申命群儒究禮經秩秩
德音咸布惠穰穰景福必求成恭虔必祠為齋
久企仰真風志克勤肅奉蕭薌嘉薦備廣覃慶
賜湛恩頻式揚丕烈心彌潔祇上鴻名道益伸
將覩虞巡陪法從幸同鳧藻樂昌辰

大安殿致齋

國陽崇大報王宇藻多儀散致尊王度懷柔祝
帝禧儲精通合漠玩志協微夷律正風來迥宵
長月上遲漏筒聲浙瀝陞戟影流離夙戒群倫
序交懽百慮怡星繁陳法仗雲密蔭平遠傳曉
鳴梢動威容罄率祇

大安殿酌獻 天書

聖運昭惟永高真協降祥方嚴泰壇祀先薦釜

山章典禮官無曠涓辰筮有常中天華闕秘象
袞眸容莊宵迥星河燦風微羽衛揚獻酬靈契
接陟降寶儀彰顧諟欽元命寅恭達上蒼彌文
輝竹帛備物儼蕭蕪尊道宸心至登春雅俗康
猶將奉齋潔禋福俟穰穰

西垣致齋日因成一章呈二相公

攝事脩雩祀齋居近紫庭千門夏雨歇高樹夕
陽生更散掖垣靜風來鍾漏清巖廊慙舊德書

殿愧群英白髮將何補丹心忽自驚敢言陪邴
魏三接奉休明

瓊林苑應制

鳳蹕出重城宸遊順物情檻花紅藥盛苑樹綠
陰成雨過池塘靜風來殿閣清樂和堯酒滿千
載樂昇平

和 御製祀后土

臨晉迎清蹕靈壇備克禋薦誠祠后土求福為

思恩詩集上
三十一
蒸民展義王猷遠推恩慶賜均千官陪漢祀萬
國奉虞巡仗衛明初日郊原麗上春花飛函谷
路柳暗大陽津宿麥深葳雉柔桑遠映人河流
迴二陝山勢壯三秦蕭鼓聞睢上旌旗過渭濱
天聲 野兵氣懾 隣在鎬皇權洽橫汾睿
藻新周南慙滯迹空想屬車塵

述懷

吾家嗣儒業弈世盛冠裳桂籍冠倫輩天下知
山深楚俗傷去恨秦城稀來音何當返煙渭自
樂于園林
歲晚亂山外野望誰能同寒沙明夕照敗葉驚
西風孤煙暝汀樹霜氣高秋空徘徊念前事旅
恨良難窮

暇日遊建平三閭故里廟貌荒涼慘動耳
目噫賢者之祀世不絕享郡無正人遺棄
若是感事傷俗因留斯句

忠厚詩集上
三十
人生苦遠遊多是悲登眺况復念三閭遺蹤良
可弔道直出章華才高逐邊徼冤聲噴夜江愁
色迷煙嶠斷碑沒敗莎古木吟荒廟祠正少來
奠岸峻稀停棹神容漬老苔壞壁通殘照舊徑
失朱門空庭起寒燒餘基雖索寞清問長光耀
旌賢誰再興勿使過者誚

水閣晨起

板閣常晏眠偶獨起清旦月落簷鳥語煙開客
舫散長江色自澄汀樹聲空亂群動又復然勞
勞可長歎

晚望有感

出門望寒野四顧惟椒坡憶昔楚大夫還此情
如何殘陽半明雨水落西風多因同下蔡恨不
覺增悲歌

庚辰歲將命至巴東時已秋序霜荷索然
偶賦是章用遣幽恨

乘軺偶將命撫俗煙江湄地僻接窮峽務簡稀
公期秋信任無趣野懷良自宜月白夜蟬響池
暗風荷衰溪雲入破牖山菊門踈籬貫酒不能
醉鄉園空結悲徘徊獨凝望目極長天涯

成安感秋

蟬噪木葉下遠客忽驚秋凝恨悲晚候萬緒皆
如抽芳時同夢幻急景如奔流念我何為者年
來生百憂貧居負勝事壯歲傷羈遊臨民慙墨
綬垂釣思滄洲達則濟天下窮當守一丘胡能
効時輩覩冒隨沉浮

感興

憶昔金門初射策一日聲華喧九陌少年得意
出風塵自為青雲無所隔主上綸才登桂堂神
京進秩奔殊方墨綬銅章竟何用巴雲瘴雨徒
荒涼有時扼腕生憂端儒書讀盡猶飢寒丈夫
意氣到如此搔首空歌行路難

暇日

江樓晝靜春陰變日午簾空飛乳鷺帆稀客散
野岸空隱隱遙峯望中見

又

郵亭落日多飛絮橈楫音重江春暮坐久凝眸
欲斷腸梅雨如煙暝村樹

南浦

春色入垂楊煙波漲南浦落日動離魂江花泣

微雨

長郊雨餘遠樹減翠新蟬忽鳴激耳嘹唳
久客孤坐情如何哉形之于文聊以自遣
遙山夏雨歇遠樹涼風至憑欄偶開襟新蟬動
秋思沙溪潔細流庭木驚踈翠節候又復然幽
憂斯所萃芳歲若奔流羲光不停轡感物悼前
期誰知此時意

雪霽池上

忠愍公詩集卷上
雪霽池上亭晴光照泉石暖覺岸冰銷靜聞簷
溜滴務簡身暫閑景幽心自適極目望南山圭
峯露微碧

有寄

金陵煙草綠玉塞霜天白萬里隔關山年來斷
消息

忠愍公詩集卷上

忠愍公詩集卷中

春日登樓懷歸

高樓聊引望杳杳一川平
遠水無人渡孤舟盡日橫
荒村生斷靄深樹語流鶯
舊業遙清渭
思忽自驚

秋思

秋氣動天地恍然情未窮
故園應墜葉昨夜又西風
白草侵危堞寒濤接遠空
搢頤當此景無

語夕陽中

再歸秦川

阮路何方盡西歸興未勞
河流經陝狹山色入秦高
返照明秋壘孤村接暮濤
還如丁令至故里滿蓬蒿

秋夜獨書勉詩友

西風驚萬木危坐思悠哉
故國經年別秋鴻半夜來
人應多弃善天豈不怜才
休學嚴夫子荒

涼老釣臺

長安書事

一從洛邑移秦甸三見東郊綻早梅
蓮府晝閑鈴閣閉柳營春暖射堂開
齋壇首冠慙諸將相印兼營接上台
何事燕公輕仗鉞却言分閫是麤才

重陽登高偶作

務閑留上客佳節值重陽
旨酒浮仙菊清歌遠

思恩詩集
卷五
三十五
畫梁高城明落日
踈樹覺微霜
且盡登臨興
餘歡尚未忘

塞上

春風千里動榆塞
雪方休
晚角數聲起
交河水未流
征人臨迥磧
歸鴈別滄洲
我欲思投筆
期封定遠侯

寓居有懷

時年十四歲

踈林頻落葉
孤僻繼離騷
獨坐聞鴻遠
閑吟見

月高夢回更自永
思苦夜何勞
寂寂西郊內
披衣聽海濤

重到進公院

伍年重到支公院
物態人情盡不同
唯有寒檉暗
秋色依然蟬噪夕陽中

野步

幽景恣追尋
遲遲傍柳陰
靜思非世務
孤立是閑心
村迥遙峯出
溪明返照侵
片沙招野步
白

鷺伴高吟積雨迴塘漲微晴疊翠深春鳩鳴古
寺煙草入平林迸笋行無定飛花勢不禁凝然
客亭上鄉思獨沉沉

秋日原上

蕭蕭古原上景物感離腸遠嶠收殘雨寒林帶
夕陽溪聲迷竹韻野色混秋光吟罷還西望平
沙起鴈行

江上晚望懷所知

遲遲迷遠信閑立大江隅遊子在何處秋風吹
五湖潮迴沙鳥聚岸閣釣舡孤歸去還堪嘆田
園半已蕪

秦中感懷寄江外知己

念子隔江海浩然時已秋蟬鳴關外樹人在水
邊樓髮白猶搜句時清尚旅遊遙思當永夜不
寐向孤舟

水村即事

虛齋臨遠水吟釣度朝晡葦岸秋聲合莎亭鶴
影孤片雲藏疊巘野燒起寒蕪獨步時吟望離
人隔五湖

暮秋感興

苒苒前期遠窮途一可傷有時聞落葉不語立
殘陽塞草秋先白溪沙晚更光那堪望天末燕
鴈又成行

秋夜感興寄吳順之

耿耿不成寐楚鄉經暮秋故人遙海嶠寒月滿
江樓閉戶生蒼蘚安閑到白頭如何太平日獨
不出汀洲

夜坐有懷寄張士遜

清秋吟更僻况復古亭間少夢蟲聲碎無風樹
影閑月華澄曲沼霜氣滿空山不見張夫子誰
人共往還

送人下第歸吳

鷺老計還失負書歸故鄉杏園無近路澤國有
高堂白鳥迷幽浦寒猿叫夕陽離懷休墮淚春
草正茫茫

秋訪江上友生所居

苔石斗寥落坐來生遠愁故人應罷釣寒葉自
驚秋村隔平沙暝江和暮靄流徘徊不能去此
處有扁舟

冬夜旅思

年少嗟羈旅煙宵未進能江樓千里月雪屋一
龕燈透信憑邊鴈孤吟寄嶽僧爐灰愁擁坐硯
水半成冰

貽趙少府

夫君何感命拾載困風塵薄宦湏流落孤吟更
苦辛山寒泉易凍邊近草難春珍重常招隱慙
非孟子鄰

春日懷張曙

時年十六歲

不見張夫子巖花幾度新
久閑空賦命遠別更傷
春雨艇秋天未煙衰隱
渭濱應嗟年未冠已作
異鄉人

初夏雨中

綠樹新陰暗井桐
雜英當砌墜
踈紅重門寂寂
經初夏盡日垂簾細雨中

感興寄蓮嶽一二詩禪友

西風傷遠別前計競成非
芳草此時暮故山何

日歸禪應同雅道
貧合長天機
翻憶雲溪伴無
繆對落暉

贈隱士

夫子才名重貧居
志未勞吟當寒夜
苦閑到白頭
高心地通禪寂
田園近海濤
不知千載後誰
更續離騷

湖上作

極目望南浦
望中生遠思
鴈況芳草
渡燒斷夕

陽陂歲月寒萍梗江山念別離猶餘清夜夢暫
與白雲期

有懷

秦川春婉晚漢水路迢迢不待凭危檻離魂已
暗銷

送李生歸秦中

酒闌還執手之子擬歸秦風雪過殘歲山川近
早春久遊詩思苦遠別柳條新後會知何日空

餘淚滿巾

書懷寄韋山人

萬事不關慮孤吟役此生風騷中旨趣山水裏
心情衆木雕寒色空江噴暮聲終期謁君子同
遠綠苔行

閑夜園碁作

歸山終未遂折桂復何時且共江人約松軒雪
夜碁

紙鷺

碧落秋方靜騰空力尚微清風如可託終共白雲飛

春雨

散亂縈花塢空濛暗柳堤望迴腸已斷何處更鴛啼

夜坐懷故友

西風起窮巷衆木又雕零蕙浦月華白竹窓燈

影青故人難重見鄰笛不堪聽行傍秋池上孤吟對遠星

南陽帝上各賦玉蝴蝶花一絕

堪賞東君造化奇裝成蝴蝶滿纖枝粉融輕翅攢花蘂疑是尋芳未去時

鄴比旅中懷友人

浮世多塵事悠悠難定期夢闌懷遠夜秋盡望鄉時道在應無悶風澆自業詩何當歸釣渚搢

肘一沉思

吊任瓘處士

一生長抱恨終亦是貧居遺信留孤鶴營墳賣
古書竹齋無俗物秋圃有寒蔬福善何言昧悠
然望太虛

秋懷

落日留不住默然空淚零敗莎侵陋巷踈葉滿
閑庭有趣窮風雅無機敵杳冥浮榮安足戀歸

去亂山青

送友生下第南歸

頻頻退禮闈此去欲忘機霄漢貧難達江湖老
獨歸程遙秋浪疊村暝夜燈微應使為儒者翻
悲苦業非

邊城春望

獨望原西路離襟倍黯然青山遮故國絕塞度
新年風聚沙迷岸煙開燒滿川歸心正無際驪

思恩詩集
四十三
騎莫留連

草

獨步高原上依依動所思無人尋蕙徑落日滿
江湄楚澤晴芳處秦川晚翠時此中興廢事千
古復誰知

送左眉州之任

分官離法署承命守眉州山館鄰孤寺春城過
亂流江雲長映日蜀魄似悲秋到郡揚清政遺

黎病必瘳

楚江夜懷

西風生遠水蕭颯度吟臺明月夜還滿故人秋
未來寒蛩啼暗壁敗葉下蒼苔誰念空江外年
年首重廻

春日書懷

曾讀前書笑古今耻隨流俗信浮沉終期直道
扶元化敢為虛名役片心默坐野禽啼晝景閉

門官柳長春陰世間事了須先退不待霜毛漸
滿簪

離京日作

離歌豈忍樽前聽別恨無由醉裏消
余久不飲酒故有是
句惟有夢魂歸北闕不知京洛路迢迢

夜泊江上

歲暮峽中村維舟古樹根群峯初落日夜後獨
聞猿流水自無盡客愁那可論平明離楚岸迢

遞指吳門

新蟬

寂寂宮槐雨乍晴高枝微帶夕陽明臨風忽起
悲秋思獨聽新蟬第一聲

寄獻廣南許虞部

南國江山五十州星郎從此播芳猷詩窮雅道
皆清唱官重名曹未白頭望斷蠻村煙樹遠吟
殘嶺月海風秋三年政滿迎丹詔諫署重膺仄

席求

送吉上人

新鴻并落葉正逐朔風飛此地仍分首何山是
所歸問程雲棧遠宿館雨燈微莫恨天涯別重
尋志未違

秋夕書懷

官路時風漸識情一悲前計遠愁生深秋寒氣
侵燈影半夜踈林起雨聲縣印終年拘吏役煙
蓑何日避浮名窮通休問巢蓮骨大抵無徒是
至清

春郊閑望

風騷高處謝知音公退何妨縱野吟弱柳不能
牽別恨片雲應念識悶心沙平古岸春潮急門
掩殘陽暮草深凝望江臯動幽興數聲鍾磬出
西林

雨中書事

一雨起前浦霏微向暮秋誰方眠釣艇我獨在
江樓山晦峯巒隱煙凝島嶼幽何當見晴旭
得泛迴舟

夜懷寄友生

遙夜獨無趣恍然思故交泉聲飛石壁星影動
林梢志壯難低俗情悶任獻嘲秋山雖入望猶
不似衡茅

秋夜懷歸

背窓寒燭影沉沉楚客鄉思欲不禁板閣漏殘
人自遠水螢光淡夜方深牢愁聞雨眠踈屋歸
夢隨雲徹故林憶着煙村舊風景柿紅時節又
鳴砧

夏夜閑書

雨濛村落野梅黃茅閣長吟水氣涼幽鳥遠聲
來獨樹小荷踈影占前塘閑心終不忘魚釣澹
水真宜習老莊報國自知無世用煙蓑何日卧

清漳

秋興浩然追憶館殿幽致偶成長句寄徐

休學士

輶車南去詠江天
閑憶群賢倍黯然
御水莎青
孤立鷺宮槐煙冷
數聲蟬石渠吏散
簾風靜
鳳闕雲歸霽景鮮
幽致不知何日共
思君唯賦帝京篇

宿江西寺

獨宿西林夜凝然
靜擁袍巫雲秋暝
峽楚月冷
生濤莎敗蛩猶噪
鄉遥夢亦勞
霜風開落葉還
欲續離騷

聞杜宇

曾為深冤無處雪
長年江上哭青春
平林雨歇
殘陽後愁殺天涯去國人

巴東寒食

春雨蕭蕭寒食天
遠行猶在楚江邊
人思故國

思思詩集
四十一
迷殘照鳥隔深花語斷煙薄宦未能酬壯節良
時空自感流年因循未學陶潛興長見孤雲倍
黯然

春晚書事

春盡江天景寂寥思鄉還共楚雲遙林花經雨
香猶在堤柳無風絮自飄水國獨慙臨縣邑煙
郊爭合負漁樵青梅時節遲歸計且逐餘芳殢
酒瓢

月夜懷故人

清夜月初滿蘚庭吟更幽梧桐踈影老蟋蟀亂
聲秋舊國情何極空江思欲流故人今底處危
坐獨凝愁

和趙瀆監丞贈隱士

不受簪裾陪盛列終年深隱養天機靜聞風雨
眠漁艇閑稱林泉掛道衣門接水村多野色鶴
當莎徑立殘暉高吟幽賞無羈束始覺趁時事

事非

雨夜書事

離人聽積雨滴滴動鄉心故國程猶遠重門夜
正深氣昏濛燼燭巢冷語棲禽遙想江南岸餘
花委故林

歸州留別傅君

楊柳如絲拂畫橋此中留語欲魂銷還愁別後
巴東館獨聽空江半夜潮

秋晚閑書

吟情自覺都無趣况復離居感物華厭讀群書
尋野徑閑收落葉煮山茶燒殘寒菊花猶在霜
過香橙味轉加因想前期重搔首不堪秋思極
長沙

聞笛

平野人歸後孤城日落時西風聞一笛惆悵憶
桓伊

縣齋春書十二韻

縣幽無俗事公退只高吟江到荆門闕山連蜀
國深峽雲長映日蠻雨易成霖群雀鳴春院饑
猿叫夜岑庭荒多古木地僻見沙禽印鑠殘陽
後人歸疊翠陰思鄉空索寞素分信浮沉樂靜
稀塵累甘閑負壯心衰容常懶櫛病髮豈勝簪
寡欲慵求友訪邪每自箴澆風終耻合前事固
難謀望斷天涯外離魂欲不禁

予頃從穰下移涖河陽洎出中書復領分
陝惟茲二鎮俯接洛都皆山河襟帶之地
也每凭高極望思以詩句狀其物景久而
方成四絕句書于河上亭壁

堤草惹煙連野綠岸花經雨壓枝紅年來多病
辜春醉惆悵河橋酒旆風
蟬鳴日正樹陰濃避暑行吟獨杖筇却愛野雲
無定處水邊容易聳奇峯

忠厚詩集
五十一
岸闊檣稀浪渺茫獨凭危檻思何長蕭蕭遠樹
踈林外一半秋山帶夕陽

暮天寥落凍雲垂一望危亭欲下遲臨水數村
誰畫得淺山寒雪未銷時

秋夜懷洛下一上人

遊宦忘機久心源亦自澄夜聽吳苑雨秋憶洛
城僧木葉驚棲鳥寒窻暗靜燈何時過竹院一
得問三乘

題花

繁花昨夜香苞裂露裊風吹照野時能與離人
添悵望一時留與子規啼

春望書事

因晴每日向吟臺縱目山城景象開白鳥靜投
沙浦去落花閑逐野泉來客愁已被楊煙染春
色難甘蜀魄催看即流芳無處問但將餘興殫
黃醅

秋 日 懷 友 生

寂寂感離群前期何足云人從秦嶺別蟬向楚
江聞村送孤煙起山空白日曛更逢疎葉落愁
續轉紛紛

春 初 夜 書

水國淹留歲月空雲山東去阻千重欲令遙夜
春愁薄須賴黃醅臘酒濃南浦有潮春柵鎖西
窗無睡怯巖鍾誰家幾點畚田火疑是殘星掛

遠 峯

江 上

古岸蕭蕭聞去鴈平蕪杳杳更斜暉空江極目
望不盡楓葉半紅人未歸

夜 望

南亭閑坐欲忘機望久前村島嶼微數點寒燈
起煙浪江艇應見夜漁歸

送 人

客亭殘照裏歌闌獨南行芳草無斷色離人多
別情遠塗方不極長笛更飛聲莫動鄉關念徒
令白髮生

早春

溪水覺暖微函碧山杏經春半吐紅不向此時
拚一醉到頭無計柰春風

寄漳川隱士

志高長說耻鳧趨歲晏園林戀隱居陋巷自落

日聞 缺

惜花

深謝暖風傳馥郁長憂夜雨暗催殘黃昏欲放
笙歌散更遠朱欄子細看

微涼

高桐深密間幽篁乳燕聲稀夏日長獨坐水亭
風滿袖世間清景是微涼

帝城秋望

登臨秋向盡千里見王畿過雨山逾翠經霜菊
漸稀平原夕靄起高樹宿禽歸一望關河道空
令詠式微

禁中偶書所懷呈內翰同年同院二學士
朝回內省中默坐對西風秋色澄寒沼朝陽上
古桐龍墀慙近待魚浦憶踈蓬會待酬恩了煙
蓑伴釣翁

新秋

孤吟遠桐砌時節又西風悵望新秋在歡娛往
事空柳條微減翠蓼穗已飄紅正是多傷感仍
將別恨中

春書

年長追遊興漸凋况兼巴峽景蕭蕭閑齋為謝
楊花到時拂殘書慰寂寥

秋日晚晴池上作

雨歇南山積翠明淡雲消盡遠天晴漪連不動

思恩詩集
三五
秋塘靜獨柱寒筇遠岸行

夏日

離心杳杳思遲遲
深院無人柳自垂
日暮長廊聞燕語
輕寒微雨麥秋時

留題郡樓

千里關河一望間
登臨長到夕陽還
欲驅征旆歸朝去
更倚高樓看暮山

青州西樓雨中閑望

海上秋添寂寞情
萬家煙樹暝重城
蕭蕭細雨遙天暮
獨向空樓聞笛聲

中書秋日有懷青社舊遊因書一首

掖垣秋色生鷄樹
忽憶青丘感舊情
曾倚西樓吟暮雨
數峯寒碧遶高城

贈寶上人

重城蕭寺雖留滯
野鶴由來性本閑
寒磬終宵鳴竹院
虛窓盡日對秋山
旋移恠石資吟賞
應

思恩詩集
有孤雲共往還自笑紅塵成底事幽期長是負
松間

雨夜許氏第會宿各賦四韻

雨夜銷煩暑林塘向夕幽庭虛惟欠月樹冷欲
生秋河北嗟新別樽前念舊遊若非逢勝會何
以解離憂

水閣夜望書懷

水閣中宵動寥寥起遠思秋風生折葦星彩動

寒池白社孤前約青雲少舊知苦吟空自歎風
雅道由衰

離京作

致君才業本無能戀闕情懷老不勝欲過龍津
重回首腫臃初日上孤稜

洛陽道中感懷

文陛初辭咫尺顏恩深猶綴輔臣班漢庭舊友
雕零盡獨擁雙旌人武關

初到長安書懷

荐承丹詔撫彫殘
適值年豐萬井安
舊職尚兼黃閣貴
前驅新擁碧油寒
淨冷風竹經宵聽
老愛山雲盡日看
魂夢不知關塞外
有時猶得到金鑾

遊花巖寺

寺對南山積翠濃
水村鷗鷺下遙空
層樓望盡樊川景
恨不凭欄煙雨中

寄京兆向相公敏中

九萬鵬霄振翼時
與君同折月中枝
試思淳化持衡者
得到如今更有誰

和向相公見寄

玉殿登科四十年
當時交友盡英賢
歲寒唯有君兼我
頭白猶持將相權

送轉運梅學士詢巡邊郡四首

悵飲惜離群
窮邊去路分
雪深山館夜
孤鴈背

燈聞

絕塞程方遠窮陰歲欲殘石城歸夢斷隴月照
人寒

水遠沉來信山長疊去愁夜深關月白休凭驛
邊樓

夙駕巡邊徼歸程隔亂山長安花木麗春苑待
君還

春晝偶書

白晝偶成芳草夢起來幽興有誰知風簾不動
黃鸝語坐見庭花日影移

秋夜懷歸

渭水苔磯阻舊遊夢回空館却凝愁一聲江笛
已雲暝半夜山風楚樹秋星落古池孤影動燈
搖踈壁冷光幽遲明不昧空搔首蹤跡何由得
狎鷗

憶洛陽

金谷春來柳自黃
曉煙晴日映宮牆
不堪花下

聽歌處却回長安憶洛陽

古歌云金谷園四柳春四柳春來似舞腰

那堪風景好
獨上洛陽橋

長安春望感懷

灞岸春波遠秦川暮雨微
凭高正愁絕煙樹更

斜暉

春晝

午晝花陰靜春風數蝶飛
生來生遠思深院燕

初歸

岐下秋書

碧樹微涼露氣清
感愁懷舊獨含情
西樓月夜明如水
只欠桓伊一笛聲

憶岐下小池

長憶西園清夜景
酒闌無不獨臨池
可怜隴月三更白
誰見紅蕖露滴時

岐下西園秋日書事

務簡群吏散披襟幽興長松篁經晚節蘭菊有
清香水淨澄秋色山高見夕陽身閒心自泰何
必濯滄浪

秋懷

輕雲不動日微陰高樹無風秋色深獨聽暮蟬
臨水坐十年林壑阻歸心

秋

自古名高衆毀歸又應身退是知機林風驚斷

西窓夢一夜愁聲憶翠

冬日北齋

寒風颯颯響庭槐愛日明窓坐北齋閑憶故
歸未得舊遊時展認雲崖

秋齋

霽景有誰同遠望秋懷無奈只悲歌雲收遠嶠
凝嵐翠雨歇空庭

洛陽有懷

綠鬢年來已漸彫，舊遊芳草路迢迢。
山橫遠翠疑歌黛，柳拂輕梢認舞腰。
秦甸夢回空有恨，洛城吟斷獨無憀。
斜陽更上高樓望，始覺離情一倍饒。

憶岐下舊遊

二年岐下假諸侯，事簡民安選勝遊。
花寺水村時駐馬，暮天秋雪獨登樓。
靜眠鈴閣聞羌笛，閑酌松醪引越甌。
別後幾回空有恨，葉飛蟬噪動

離愁

無題

金甲珠襦鏤繡局，杜城殘月葬娥英。
春風候館花如雪，空有鶯傳度曲聲。

秋日登後樓

遠山重疊故關遙，公退乘閑上麗譙。
今日登臨秋思苦，雨荷風葉共蕭蕭。

早春

星紀周天運微陽氣候新郊原初度臘梅柳暗
驚春故國無書久孤峯入夢頻年加自多感况
復送歸人

南陽夏日

綠楊陰密覆回廊深院簾垂晝景長人靜獨聞
幽鳥語風來時有異花香世間寵辱皆嘗遍身
外聲名豈足量閑讀南華真味理片心惟只許
蒙莊

夏日有懷

庭樹陰陰夏景遲閑房愁對暮簾垂因思往歲
陪天仗正是瑤池賜宴時

途中作

秋末楚雲端行侵苔蘚斑愁腸不厭酒病眼豈
逢山遠路有時到宦遊無處閑却思清渭北煙
柳掩柴關

喜吉上人至

喜師來訪我幽會興何長清論都無倦鄉愁頓
欲忘疏林秋色暮虛閣水風涼久坐慵言別微
陽下短牆

書黃山館壁

殘日住孤館遲遲行古臺大河連野去白鳥背
城來離恨渾如結鄉心漸欲灰山花半寥落猶
在社前開

巴東驛秋日晚望

楚驛獨閑望山村秋暮天數峯橫夕照一笛起
江舡遣恨須言命冥心漸學禪遲遲未回首深
谷暗寒煙

掩卷

掩卷頻秋望無人共展眉殘陽留古樹白鳥下
寒池簪組心還倦風騷志未衰登臨一長嘆還
失渭川期

巴東書事

思楚屈原
鄉思終日有孤淡厭琴樽衆木侵山徑寒江逼
縣門浪沉灘見春雨過壁生痕憔悴悲蘭蕙因

池上秋書

虛齋獨語復書空閑對林塘思少同霜葉聲乾
飄夕照露荷香冷泣秋風時平偶作青衫吏心
老渾如白髮翁昨夜渭川歸好夢一舸煙雨打
孤蓬

書懷寄郝監軍

索居終日學忘機深嘆高堂養獨遲自問江村
紆墨綬何當煙浦坐魚磯夢迴渭水秦雲斷望
盡巴山蜀魄飛好恠多才郝夫子道孤俱未及
輕肥

南平驛

心隨流水還鄉國身向青山上屈盤秋夢不成
秋雨細西風一夜客亭寒

悶書

秋憶故鄉魂欲斷
晚臨寒浦思如流
歸來古屋寒燈暗
能較騷人幾處愁

秋寄江上吟僧

掛錫在荆楚
杜門無往還
潮聲到孤寺
月色遍前山
一鴈驚幽思
西風慘病顏
何當重携手
高步白雲間

江上晚望

寒鍾來極浦
古寺隔重巖
斜日搭頤坐
天涯落日帆

金陵懷古

極目望吳甸
野煙凝亂流
夜來榆塞鴈
叫斷石城秋
舊苑荒餘草
平川半古丘
遲遲獨迴首
落日一蟬幽

暮春感事

春至又春暮
閑心成古心
花光隨雨薄
草色共

煙深粉蝶稀狂影黃鸝送好音餘芳留不得還
共夕陽沉

秋興

窮秋九月西風高疎林木落聲蕭騷出門長望
無所適唯見空江生暮濤

春日閑望有感

水鄉春氣變新正風物光榮異帝城閑步偶尋
芳草色空林獨聽野鶯聲煙霞未得從幽興吟

賞潛悲減舊情燕麥楊花自搖蕩不知離客困

南征

江上聞鷓鴣

水村煙樹與雲平閑倚孤舟念遠行無奈鄉心
倍寥落殘陽中有鷓鴣聲

醉題

榴花滿筯撥寒醅痛飲能令百恨開大抵天直
有高超騰騰須入醉鄉來

和趙監丞春江送別

孤舟東去水煙微
久客那堪更送歸
三月江頭春盡日
片帆輕絮共紛飛

送李生二絕句

愛君白髮無羈束
命駕常為千里遊
一夜春江又迴棹
當時風雨滿汀洲

又

晴色半和行色遠
江頭別來欲何之
數盃酒盡

又南去正是落花春暮時

與詩友會宿

此夕南軒宿論詩
萬慮忘苦吟
秋信近
寂坐漏聲長
空靜燈光暗
桐疎露氣涼
幽懷聊自遣
山色漸蒼蒼

南冠亭秋晚閑望

南冠亭外淡江天
又客登臨更浩然
遠浦秋深
翻白浪
孤山日暮起蒼煙
已嗟異國逢衰節
况

復西風聽亂蟬倦鳥知還雖有意故林無柰隔
秦川

峽中春感

二年窮峽外不見帝城春覽照知年老逢花感
岷頻浮榮何足貴幽別轉難伸終憶歸清渭林
泉卜舊鄰

東歸再經峽口

復命經三峽波瀾極目愁片雲生斷壁孤石

中流道路連巴塞風煙接楚丘重來登望處
念昔年遊

江上晚行

秦川不得却歸耕奉詔年來在楚城孤寺殘鍾
催夕照汀洲疎葦送秋聲西風獨起湖山思久
客應知寂寞情野鶴漸無驚弋意對人孤立水
煙平

初秋即事

古邑端居夏景移
炎飈經雨自收威
蓮衰小渚秋光淡
蟬噪平林夕照微
冷句每招江客和
深心終約嶽雲歸
晚涼却近南亭立
獨看沙鷗向浦飛

蓮

數柄疎荷出小池
幽香深謝好風吹
撓來秋氣凝清露
似學湘妃怨九疑

望都雨夜

孤驛蕭條風雨夜
夜深窻竹動秋聲
離魂無難成夢却
遠長廊獨自行

成安秋望

八月西風蟬噪時
蕭蕭疎葉已辭枝
煙村物景都無賴
况是登臨有所思

夏日晚涼

微涼天氣似秋期
風觸疎簾影自移
遠夢有時尋水寺
孤吟終日對莎池
笋梢成翠堆輕籜
梅

實翻黃壓嫩枝兀兀騰騰聊自遣此懷深謝野
僧知

輦下書懷

身名長似夢家計盡蕭然旅宦遊梁苑歸心滿
渭川郊原秋變色桑柘晚生煙願得長閑去何
妨老一廬

冬日偶書

戶庭初過雪烏雀亦聲稀天淡雲容結林寒日

影微虛名何足道前是旋成非簪紱全忘念終
須掃澗

巴東縣齋秋書

訟庭終日靜琴鶴亦長閑晚樹生涼吹秋思在
遠山水穿吟閣過苔遶印床斑幸有江雲看何
須卜往還

江行書事

孤棹沿流岸凝懷似舊遊朝雲生嶽頂斜月動

江流賤節難于世
離心易感秋
因思六朝事
千古有遺愁

題楊氏別墅

門巷枕江濱
疑將俗境分
湖山晴後見
天籟靜中聞
徑僻苔空老
林寒日漸曛
高懷無一事
長歲似孤雲

再到鄴下有感

漳濱勝地皆牢落
晚歲重來恨莫收
極浦寺藏

雲樹老故人
門鏤雨苔秋
煙霄得路輸時彥
泉石忘機阻舊遊
今日重思昔年事
放懷惟上夕陽樓

成安秋望有懷

年加心地轉如灰
書篋經旬亦懶開
詩句偶吟皆感事
文章無用獨傷才
秋蟬殘韻搥疎樹
夕照寒光下古臺
閑遠岸莎看野水
暗流紅葉不重回

書懷寄唐工部

不才曾忝吾君選紫殿科名志已酬
孤立敢言逾素分高吟深愧預清流
西風獨見江籬暮紅葉還思苑樹秋
多謝明公知賤節每貽清句緩牢愁

鄴中和崔邁著作

虛室凝愁厭夜眠長吟靜對欲涼天
夢迴故國人空遠望斷重城月自圓
時泰未能拋組綬性

孤終是憶林泉明朝奉詔遐方去
何處煙江寄客舫

獨倚空樓畏景殘凝眸魂斷楚雲端
猿清好雜江聲聽山遠宜和霽色看
鳥掠平蕪堪入畫風來危檻欲生寒
蕭蕭前浦歸帆靜落日長吟且凭欄

漢上偶書

謫仙唐室遊茲郡花下聽歌醉眼迷
今日漢江

思賢詩集
卷之三
煙樹靜更無人唱白銅堤
李白常有歌云日欲
落花下迷鹿門小兒齊拍手
落岷山西遊客醉歸

春陵聞鴈

蕭蕭疎葉下長亭雲淡秋空一鴈經惟有北人
偏悵望孤城獨上倚樓聽

又

危欄秋盡偶來凭霜落秋山爽氣澄誰道衡陽
無鴈過數聲殘日下春陵
衡州有回鴈峯云鴈
止于衡陽不得

贈魏野處士

人間名利走塵埃惟子高閑晦盛才歆枕夜風
喧薜荔閉門春雨長莓苔詩題遠岫經年得僧
戀幽軒繼日來却恐明君徵隱逸溪雲誰得共
徘徊



忠愍公詩集卷中

國家圖書館, NATIONAL CENTRAL LIBRARY, TAIWAN, R.O.C.

忠愍公詩集

卷中

忠愍公詩集卷下

荆南秋望

西風吹戶牖猶自客荆蠻
積水浮秋漢微陽淡
遠山蟬稀疎葉盡
雨歇片雲閑
何日忘簪紱
深居石室間

江上送別

浪疊春江遠
樹微落花風
雨共淒淒
愁人此際
腸須斷
况是登臨
更送歸

送人往嶺表

炎光君此去旅恨杳何窮
海樹瘴煙黑蠻村山路中

秋日

柳衰蟬噪寒煙淡地迥山遙
暮雨收宛是昔年秋氣味
只添多病與離愁

留題洛北羅漢閣

地高閣迥宜閑望望盡雲山
首懶迴林下野僧

應笑我半年旌旆四曾來

判都省懷感

昔為學士掌三銓屈指年光
三十年秋雨滴塔

桐已老白頭重到倍依然

余頃年手植桐樹在省有朽者

輦下春日

雨餘宮闕麗春陰三月花光
照上林誰倚青樓望歸騎
日斜南陌柳煙深

南宮宿齋靜思陝城東閣竹

南宮向夕景彌清
風竹蕭然動遠情
憶到陝城東閣伴
拂窻敲砌送寒聲

途次方城

方城舊路四曾過
此度偏饒悵望多
獨倚客亭思往事
南陽何異夢南柯

經郴州永興驛

昔擁雙旌在郢城
今朝孤館語同名
天遙秦樹無因見
極目空饒悵望情

臨海驛夏日

嶺外突蒸當盛暑
雨餘新館覺微涼
最怜夏木青陰合
時有鶯聲似故鄉

海康西館有懷

風露淒清西館靜
悄然懷舊一長嘆
海雲銷盡金波冷
半夜無人獨凭欄

長安春日

淡淡秦雲薄似羅
灞橋楊柳拂煙波
夕陽樓上

山重疊未抵愁春一倍多

病中書

多病將經歲逢迎故不能書
惟看藥錄客只待醫僧
壯志銷如雪幽懷冷似冰
郡齋風雨後無睡對寒燈

長安春書

務閑公府都無事
騎吏前驅引馬行
雨霽晚街官柳色
日長春寺講鐘聲
雲山已有終南秀
泉石猶思洛下清

聞道曲江新水滿
欲携歌管出重城

宮詞

長門秋夜雨
窗外滴寒聲
悔不先辭輦
應無別恨生

柳

綠翠最宜經宿雨
絮飛爭忍逐香塵
簾垂獨院無人處
一樹風搖日午春

杜陵

燕有情還至花無主亂開杜陵人不見夜月自徘徊

左馮寺樓閑望

閑思至道年中事獨倚左馮城外樓目斷平臯人不見暮天無際水悠悠

偶書

往事都如夢流年只斷魂不堪春盡日細雨欲

黃昏

途次鄧州

南陽西去見遺基駐馬平郊遠樹微自笑平生無所着不如山鳥解思歸

春雨

漠漠霏霏着柳條輕寒爭信杏花嬌江南二月如煙細誰正春愁在麗譙

感舊

長思密勿待甘泉丹地翱翔獨少年重到文昌
倍惆悵秋風霜鬢共蕭然

途次二絕

秋風故關路蟬噪日斜時有客驅征馬茫茫天
一涯

大澤荒草闊行人心慘悽邊雲時斷續流水自
東西

沙閣戍樓迥風高邊日清遲遲驅足馬何上處

此後
缺

甘棲短褐侯門終不曳長居夜吟雪屋冥搜
句春結煙蓑老釣漁為我紅塵偶為吏近來還

寄絕交書

又

慵趨大廈戀山薇立志由來與世遠溪上有時
逢靜釣雪中長日掩閑扉自知天爵高人爵不
愛朝衣換布衣我逐浮名任飄泊清泉難得共
忘機

題巴東寺

寺在啼猿外門開古澗涯山深微有徑樹老半
無枝望遠雲長暝談空日漸移恐朝金馬去還
失白蓮期

贈隱士

夫子住東野經年不到城愛吟無俗趣貧靜得
閑名荒徑侵山影虛堂出燕聲我慙為俗吏泉
石負幽情

南亭晨望寄唐知印

夢覺偶晨起南軒還獨過曉光生遠樹露氣冷
踈荷窻白遊塵少風清靜興多遙知江郡守幽
趣在煙波

殘月

半夜沉清影宵殘猶半吟已甘垂樹杪由得掛
天心淡色迷蓬戶餘光映宿禽誰家傷早別凝
思共沉沉

又

光隨春偏細影共夕煙流若近明河沒還疑墜
玉鈎

巴東有感

長歲天涯悲斷梗逢君無處不傷情
那堪日落紅樓伴更聽蕭蕭杜宇聲

省夏書事

窻戶經初雨風清野景饒
閑庭猶戲蝶高樹已

鳴蛩世態貧中覺鄉思醉裏銷
縱吟還獨步時復過溪橋

和李逢同年水閣閑望

務簡凭危檻凝然感物華
孤村經野燒極浦見漁家
灘急舟難渡山高日易斜
明時如道在焉復痛懷沙

塞上秋懷

未識窮邊苦今遊信有之
秋林殘照後關路獨

行時磧迥風長急天寒鴈度遲離心已無賴更
聽戍樓聲

送人歸吳

忽憶湖山景汭流興不窮孤舟將去夜絕塞已
來鴻白髮前期近滄川舊業空明時方道在莫
更學漁翁

秋日

江天物候潛衰變氣爽初疑夏景餘雨漬亂苔

侵古壁風飄紅葉滿荒渠晚雲連嶽幽藏寺秋
水澄江靜見魚昔歲一鳴無所恨綠槐金蘂任
蕭疎

寄贈笠澤處士

笠澤漁人高節竒白頭猶自着蓑衣吟過竹院
僧留宿釣罷煙江鶴伴歸花落砌邊春雨歇酒
醒林際夕陽微中朝名士皆知已多說東來信
亦稀

柳

曉帶輕煙間杏花晚凝深翠拂平沙長條別有
風流處密煙錢塘蘇小家

喜吉上人至

鄴北至夔城三千里外程勞尋苦吟伴獨入亂
山行楚水秋無際巴猿夜有聲逢師不能寐因
話故鄉情

早秋 二絕

年光苒苒暗推移坐昔流年感舊期獨聽早蟬
秋色裏潘安初見二毛時

一聽早蟬響坐悲芳歲闌新秋空索寞前事但
心酸

秋日武關道中

行塵漠漠起西風來往征軒似轉蓬駐馬幾多
愁思苦亂蟬衰柳武關中

早春

日暖經冰泮，潛回律管春。
初驚柳色重，漸見草芽新。
樽酒留懽少，雲溪入夢頻。
惟應五侯地，行樂及芳辰。

書山館壁

時年十九

秋作西南使，千林覆去程。
四時無日影，終夜有猿聲。
路入溪雲過，人穿鳥道行。
不堪孤驛望，風雨動鄉情。

送趙主簿之任惠安

蕭蕭征騎立長亭，遙指天涯萬里程。
尊酒欲闌人欲別，夕陽綠管盡離聲。

秋氣凜然庭木將墜，道謙上人有南征之

役賦詩祖行

洪府多佳致，師今欲此行。
寒山連楚遠，白浪浸吳平。
煙雨經秋迥，霜鴻入夜鳴。
到時春未暮，閑聽鷓鴣聲。

酒醒

勝遊懽宴是良圖何必淒淒獨向隅
深院酒醒春日晚只聞芳樹語提壺

南陽春日

水滿池塘花遠城日斜南陌暖風輕
千門柳色春煙淡獨倚高樓聞暮鶯

春日長安故苑有懷

唐室空城有舊基荒涼長使後人悲
遙村日暖花空發廢苑春深柳自垂
事著簡編猶可念景

隨陵谷更何疑入梁朝士無多在
誰向秋風詠黍離

送人遊邊

遠行當歲暮冰雪路難分
足馬陽關外邊聲問歸程

冬日偶成

正是旅愁悲遠宦况逢邊塞向殘年
輪蹄影絕冬深路鳥雀聲稀雪後天
探騎經句無使客戍

樓終日有烽煙病來無復拈樽酒獨向虛窻盡
日眠

九日群公出遊郊外余方卧郡齋聽水因
寄一絕呈諸官

菊老東籬人病酒西風黃葉滿荒田不知今日
登高興何似虛堂聽水眠

春日偶書

柳岸花塘慵獨賞閉門春盡阻閑遊少年多故

心先老却彼人疑似白頭

送溫尚書入洛

蕭蕭紅葉馬前飛又送王孫畫錦歸却到舊遊
應悵望故溪秋蘚滿魚磯

小韓店

昔從鄴下游梁苑孤店曾經十數迴歲月暗移
人事改白頭重到小寒來

虛堂

虛堂寂寂草虫鳴
歌枕難忘是舊情
斜月半軒
踈樹影夜深風露更淒清

憶樊川

閑想舊遊都似夢
別來秦樹又西東
高秋最憶
樊川景稻穗初黃柿葉紅

東窻

徒倚東窻夜未明
悄然幽館獨凝情
燈搖古壁
秋虫怨露下踈林宿鶴驚
道在任從時態薄年

加潛覺睡魂輕
待酬北關君思了
歸聽冰泉落
石聲

九日不飲

雲淡長空日欲斜
永邊衰柳噪寒鷗
病來不飲
空淒感獨遠東籬詠菊花

和人春暮

流年賦分長多感
盡日長思立短亭
猶謝海棠
花始發似留春色向凋零

又

昔曾過洛浦遺恨寫蒼苔往事詩空在春深我
獨來

早行

嚴鍾將報曙遊子已登途野火時明滅殘星似
有無

忠愍公詩集終

再開萊公詩集後序

萊公兩朝大臣勲業之盛掀天揭地人皆知有
其名而往往或不知有其詩何也蓋勲業有以
揜之也伊尹之訓周公之誥著在方冊表裏典
謨而自古及今論文者必曰孔孟而不曰伊周
蓋伊周之可稱在於興商輔周訓誥之作不足
道也公清才雅韻冠絕一世播於篇什平淡淳
正得風雅之體自其少年從仕以至立朝退處

懽愉送樂激烈憤惋無不並見於詩太原范伯
純始收什編錄分為三卷春陵得之尤其後也
蓋公晚年遷謫嘗至春陵邦人思慕不忘由是
建樓畫像以崇朝夕然而詩編之傳家不百一
焉逮宣和間王公次翁來茲曳組景仰前脩因
取舊集刊板以傳士夫鼓舞以相夸詫而春陵
景物由是增輝矣近時楊守惇亦即舊板重加
邦治至此未幾而字之漫滅者復且過半數適

茲承乏政事之餘取而閱之深恐浸以失真復
命校正鳩工一新焉昔白居易謂劉禹錫之詩
在處應有神物護持禹錫一文人徒以句韻之
工識者竒之尚且如此况公文章所在當如何
哉吾又知自有不可得而漫滅者存焉爾隆興
改元七月 日長樂辛敷書

予昔時錄藏宋萊國忠愍公詩迄今幾四十年
懼其字畫磨滅而未可以言久也且公為華之
下邳人予忝鄉曲之末方圖刻之轉相流布俾
公口齒膏馥霑被後人而力未能近攝三原縣
事零陵蔣君鏊至會予于歸來之堂話及公之
言行傾仰切至予因曰家藏公集舊矣出以示
之喜而懷歸遂捐俸以永其傳則其為學之要
為政之體可以見矣時嘉靖乙未歲春正月丁



卯平川野逸王承裕記

卯平川野逸王承裕記